

Dingzdingj Bouxcuengh:

Gij Sing Faedbiengz Swnjcienz Vwnzva Minzcuz

传承民族文化的天籁之音——壮族天琴

□ Loz Siliz Banh Yi



▲ Mbanjbanjciz Lungzcouh bouxswnjcienz dingzcingj nienz-geij ceiq oiq Lij Wnhbingz youq gwnz ruzyouz son dahniq danz dingzdingj.

◀ Gyoengqsau Bouxcuengh youq gwnz ruzyouz danz dingzdingj.

▲ Canghsae son siujhagseng danz dingzdingj.



▲ Aen yizsi "diuqmbwn" dingzdingj miz yiengh ciuhnduj.



▲ Gyoengq dahsau Mbanjbanjciz gyaundeiz youq rox danz dingzdingj.



▲ Lungzcouh Minzcungh gwnz dangz son hagseng danz dingzdingj.



▲ Youq lajmbanj Lungzcouh seiqseiz raen yienj foux dingzdingj.



▲ Dahsau danzciengq dingzdingj.

Bi 2003 ndwen 11 ngoenz 8, Aenciet Yisuz Minzgoh Gozci Namzningz "Haemh Fungcingz Dunghnanzya", "Lwgmbwk Gyoebhab Danzciengq Dingzdingj Lungzcouh" umj aen dingzdingj, din ngauz roix lingz, doq danz doq ciengq, hot dingzdingj danzciengq 《Go Ciengqmbwn》 he ciengq gij go ciuhgeq riuzcienz baenz cien bi haenx goksas, hawj daengx seiqgyaiq roxyiuj le dingzdingj Bouxcuengh. Gij yisuz danzciengq dingzdingj yiemj deng saetcienz haenx, ginggvaq bouxmaeq vwnzva Bouxcuengh bae vatgud cingjleix, youhdauq yaprongh gwnzbiengz. Bi 2007 ndwen 1, yisuz dingzdingj Lungzcouh ndaej lied haeuj le Guengjsae buek daih'it feihvuzciz vwnzva yizcanj mingzloeg.

Dingzdingj dwg gij daiyauj daegsaek gammiz vwnzva minzcuz Loegvet ndawde cungj ndeu, caemh dwg Bouxcuengh sam cungj yozgiz ndaekndek ceiq gaeuqgeq ndawde cungj ndeu, youq Lungzcouh, Ningzmingz caeuq Fangzcwnz gij ranghdieg baihsaenamz Guengjsae caeuq Yeznanz gapgyaiq haenx riuzcienz, daengz seizneix gaenq miz baenz cien lai bi lizsij. Beixnuengx Bouxcuengh Lungzcouh ciuq gij sing cungj yozgi neix fat okdaej haenx heuh aende guh "dingzdingj", dwg cungj yozgiz vunz dangdieg guh gij hozdung caeqbaiq, gangjciengq caeuq saedceij ngoenznaengz noix mbouj ndaej ndeu. Dingzdingj dwg youz ganjgimz, sugyienz, maxgimz, yienzgimz caeuq gyonggimz aeu byuklwgyoux guhbaenz haenx gyoebbaenz, ndaej gagdanz, habdanz roxnaeuz vih gofoux buenxdanz, bouxdanz baez naengz aeu raek roix lingzdin ndeu riengz cietbek ngauzdoengh. Dingzdingj cezcou byotbet mingzbeq, mbaeu mbengq saetdiuq, hamz miz cungj

heiq saenzmaed ndeu, gig miz daegsaek Bouxcuengh.

Gij yiengh dingzdingj lumj ngeihyienz benj, hoeng caizliuh, gezgou, dinghyienz cix mbouj doxdoengz. Diuz ganjgimz de dwg aeu faexyienq daengj gofaex genggenq dijbauj dieg Bouxcuengh cij miz haenx daeuj guh, raez mij ndeu, deu miz rizraiz gyaep lungz, gyauejgimz deu baenz yiengh duzfungh, aenyaenq dungsai, daengngoengz roxnaeuz ronghndwen, mbangj ndaej yut ok faen baenz sam gyaengh oetcoux haeuj daeh'aemq, fuengbienh daiq okrog; swixgvaz gak daep diuz sugyienz aeu faex guh ndeu; doengzgimz aeu lwgyoux roxnaeuz mbokfaexcuk guhbaenz, lumj buenq aen giuz nei, na 10 lizmij, mbiengj gyoeng aeu ronggya roxnaeuz benjmbang faexgyaeuq nemndaet, diuzyienzrog dingh guh yaemdaemq, yaemsaek doiqbeij mingzyienj, fuengbienh danzyienj singhab. Dingzdingj miz sam cungj biujyienj hingzsik, it dwg "danzmbwn", couh dwg gagdanz, ngeih dwg "ciengqmbwn", couh dwg buenxdanz yienjciengq, sam dwg "diuqmbwn", couh dwg doq danz doq ciengq doq diuq. Gij biujyienj hingzsik neix miz bouxmaeq naeuz dwg gij yinhyoz guhmo ciuhgeq Loegvet gaenq deng ciedraeg haenx, nyuenz dwg yahgimq (yahsien) vih vunzraeuz guhmo siu nanh yw bingh seiz yungh daengz, gvaqlaeng cungj gofoux danzgimz daiq miz singqcaet guhmo nei yienjbienq baenz le gij hozdung yienjheiq guh'angq vunzlai caemh guh ndeu. Ciuq mbangj lauxhangz gaujcingq, gij diuhgo yinhyoz guhmo ciuhgeq Bouxcuengh miz 72 cungj baenz lai, seizneix caenh miz 20 lai cungj ndaej riuzcienz roengzdaej. Yinhyoz dingzdingj dingzlai aeu gij hingzsik singhab okyienh, gij

fuengsik giethab de miz singnga, doiqbeij, rw'ngon caeuq gak cungj yaem'wenq dakdaix, bienvraq lai cungj lai yiengh. Ndaw go ciengzciengz miz yaem dinghyang, baenzneix ok le cungj yaem diuhgyang geizheih ndei dingq ndeu.

Seizneix, dingzdingj gaenq baenz le Lungzcouh Yen aen binjbaiz vwnzva mizmingz ndeu, yisuz dingzdingj ndaej daengz vatgud caeuq cienzdo. Daj bi 2008 gvaqdaej, Lungzcouh Yen moix bi cungj banh ciet yisuz vwnzva dingzdingj, doenggvaq ngoenzcienz gyagiengz caeuq ndaw guek rog guek yisuz donzdij doxyau, daezsang gij binjbaiz caeuq mingzdaez dingzdingj; daj bi 2011 hainduj, gij siujyoz ndaw yienh cungj laeb le aenban son danz dingzdingj, daengx yienh moix bi miz bouxhag dingzdingj sam seiq bak vunz ndaej hag rox danz dingzdingj, yisuz dingzdingj ndaej daih dem daih swnjcienz roengzbae.